



Da la suprastanza cumünela

Persunel tscherna contabla/-el

Per la contabiltad da la vschinauncha, da la Bos-chetta Plauna e per la scoula da la Plaiv tschercha la vschinauncha da S-chanf üna nouva contabla/-el. Zieva cha'l contabel tschernieu nouv nun ho piglio sü sieu lavur es gnieu publisheda la piazza da nouv. L'ultim termin per as annunzchar d'eira ils 23 november 2017. Tschinch candidaturas sun inolterdas. Üna persuna s'ho retrat da l'annunzcha causa üna situaziun familiera. Il chanzlist ho gnieu trais discuors d'annunzcha. Las qualiteds professiunelas sun avaut maun. La suprastanza cumünela decida unanim da tscherner a sar Riet Denoth da Zernez scu nouv contabel da la vschinauncha da S-chanf.

Contart da fittaunza alps e pasculs S-chanf

Illa tschantada da la suprastanza cumünela dals 08 november 2017 es gnieu discus l'agir in futur cun der a fit las alps ed ils pasculs a S-chanf. Id ais gnieu decis cha fin la mited da december stu esser avaut maun ün contrat cha'l Plantahof ho gieu l'incumbenza d'elavurer. In cas cha'l contrat finel nu es avaut maun, vegn desdit per precauziun Il dret da nüzzer ils pasculs e las alps sün la fin 2018. La suprastanza cumünela repassa il sböz da quist contrat e fo püs müdamaints.

Tempo zona 30 Pradels

In subsituziun da cunfinants dumanda üna firma da fiduziari a la suprastanza cumünela da fer üna zona 30 eir a Pradels. Zieva discuors cul planiseder da vias e la pulizia chantunela dal Grischun s'haun musso sü divers argumaints (marchapè existent e mancaunza d'aglomeraziun) cunter üna zona 30 a Pradels. La suprastanza cumünela decida unanim da refüser quista dumanda.

Contrat da fittaunza POLYCOM Alp Griatschouls

Cun cumainzamaint da la fabrica ils 01.07.2010 es gnieu fabricho e fat ir ün'antenna da Polycom. Id es gnieu manachanto da stipuler ün contrat da fittaunza. L'adiministraziun federela da duana suottametta a la suprastanza cumünela ün sböz d'ün contrat surelavuro per la suotta-scripziun. Eir quista versiun da contrat nu cuntainta. Il president propuona d'aderir il contrat cun il seguaint müdamaint: Il fitteder permetta sieu acconsetimaint da fer cunadöver da seis terrain, stabilimaint e indriz da func tres terz. La suprastanza cumünela decida unanim d'aderir a la proposta dal president.

Surdeda lavuors d'indschegner halla Bos-chett Plauna

La suprastanza cumünela ho da prümavaira 2017 surdo las lavuors d'architectura e prestanziuns d'indschegner al büro d'architectura Glistenti. Per realiser quistas lavuors d'indschegner dumanda l'architect da lascher fer las lavuors tres il büro d'indschegner Liun Quadri. Ils cuosts sun cuntgnieu i'l offerta d'onurari. La suprastanza cumünela decida zieva animeda discussiun da der il dret a Liun Quadri da pudair surpiglier quista lavur scu depüto da departemaint.